

Kontuola

ANTZUOLA / Egubakoitza / 2004ko urtarrilaren 16a / 185. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02



Joxe Joan Gonzalez de Txabarrirekin batera, azpiegituretako diputatu Xabier Zuriarrain ere Antzuolan izan genuen.

Proiektu ugari aurkeztu ditu Udalak jendaurrean

AINTZANE IRIZAR

Joxe Joan Gonzalez de Txabari diputatu nagusia alboan zuela, Udalak datozen urteetarako aurrez ikusten dituen hainbat proiektu aurkeztu zuen Jose Angel Zabalo alkateak eguzten arratsaldean. Tartean, baita orain arte ezagutzen ez genituen proiektuak ere.

Eguaztenean etorri zen Gipuzkoako diputatu nagusi Gonzalez de Txabari Antzuolara. Eguerdian, Udaleko ordezkariekin elkartu zen; bazkalostean, herriko enpresetako ordezkariekin, eta arratsaldeko seietan, Jose Angel Zabalo alkatearekin batera, herriko hainbat proiektu aurkeztu zituen.

Aurkeztu zituzten proiektuetako asko ezagunak ziren; beste batzuk, baina, ezustean hartu zituzten herritar askok. Proiektu horietako gehienak, Jaurlaritzaren Izartu programari esker eraman ahal izango dituzte aurrera. Gainbehera datozen udalerririak suspertzeko laguntzak ematen ditu Jaurlaritzak, Izartu programaren bitartez. Ekonomia,

gizarte edota nekazaritza arloan aurrera egiteko laguntzak dira Jaurlaritzak ematen dituen horiek. Izartu programaren diru-laguntzen bigarren deialdia egingo du oraintxe Eusko Jaurlaritzak; hil honetan bertan aurkeztuko dute Izartu programa, Bilbon.

PROIEKTU GARRANTZITSUAK

Proiektu ugari eta garrantzitsuak aurkeztu zituen alkateak datozen urteetarako.

Guztira, zortzi proiekturen berri eman zuen Zabalak. 7.200.000 bat euroko aurrekontua dute proiektuok. Erdia Izartuk finantzatzeko duen arren, beste erdiari aurre egiteko gai ez da Udala. Horregatik, proiektu horietako bat da Udalak etxebizitzak egin

eta saltzea, gainerako proiektu guztiak aurrera eraman ahal izateko.

Gaur egungo frontoia bota eta hantxe egingo dituzte etxebizitzok. Ez gara, baina, frontoirik gabe geratuko herrian; izan ere, bigarren proiektu bat da Zupide eta Iriarte artean kiroldegia egitea. Hantxe egingo dute frontoia ere.

Egiten dituzten etxebizitzetan, beheko solairu guztia (1.000 metro koadro) Udalaren esku geratuko da; hantxe egingo dituzte anbulatorioa, erretiratuen egoitza, eguneko zentroa, etxebizitza tutelatua eta gimnasioa.

Gizarte Etxea, berriz, bi solairutakoa izango da. Gaztetxea, zinema, liburutegia eta abar egongo dira han. Gaietan, beste hiru solairutan, Udalak babestutako hamabost etxebizitza egingo ditu.

Horiek dira proiektu berrienak. Gainerakoak, berriz, honakoak: bi bidegorri egitea, Uzarragako zubitik Elayra errepi-dea egitea, Haurreskola Partzuergoan sartzeari, baserrietara edateko ura eramatea eta alde zaharra peatonalizatzea.

Frontoia bota eta etxebizitzak egiteko asmoa dute; baita kiroldegia ere, frontoi eta guzti

ELKARTASUNA

Sahararako janaria batzen hasi dira

AINTZANE IRIZAR

Saharara bidaltzeko janaria eta dirua batzeko kanpaina abian jarri du Saharar Errepublika Arabiar Demokratikoaren Lagunen Elkarteak; Anelkarrek, Udalak eta Herri Ikastetxeak bat egin dute kanpaina horrekin, eta hasi dira dagoneko janaria eta dirua batzen.

Martitzenean jarri zituzten janaria batzeko kaxak, eta hilaren 21era arte egongo dira. Udaltxean, Eroskin, Juanitaren dendan eta Herri Ikastetxean jasoko dute janaria. Oinarrizko elika-

gaiak jasoko dituzte: arroza, atuna, lekaleak, pasta, azukrea eta olioak. Jasotako dirua, berriz, janaria bidaltzeko erabiliko dute. Anelkarren kontu korranteetan sartu dezakezue dirua.

KONGORA, 12.000 EURO

Bestalde, Anelkarrek jakinarazi digenez, 9.810 euro batu zituztela azaroan eta abenduan Kongorako. Udalak 6.000 euro eman zituen, eta beste 3.810 euro batu zituzten herritarren artean. Aurretik batuta zuten dirua gehituta, 12.000 bat euro bidaliko dute Kongora, eskolak egiteko eta umei eskolarako materiala erosteko.

LABUR

Gerra zibilaren gaineko hainbat ekitaldi izango ditugu, eguenean, hilak 22, hasita

Eguenean, hilak 22, hitzaldi batekin hasiko dute gerra zibilaren gaineko ekitaldi sorta. 19:00etan izango da hitzaldia Orlanaren. Juan-txo Agirre Aranzadi zientzia elkarteak idazkaria eta Eusko Ikaskuntzako arkeologia saileko lehendakariak egingo du hitzaldia. Bestalde, hilaren 24an eta 25ean eta hurrengo asteburuan, gerraren gaineko erakusketa jarriko dute Orlanaren. Hilaren 25ean, azkenik, Joseba Tapiaren kontzertua izango dugu, 19:00etan, eskolako aretoan. *Agur, Intxorta maite* diskoa aurkeztuko du.

KZGunea egubakoitz goizetan bakarrik zabalduko dute hemendik aurrera

Hemendik aurrera, egubakoitz goizetan bakarrik zabalduko dute Orlan etxean dagoen KZGunea. 09:00etatik 13:00etara, hain zuzen ere, egongo da zabalik. Irakasle bat egongo da hantxe, erabiltzaileei beharrezko laguntza eta azalpenak emateko. Hortaz, ez da gehiago Internetaren gaineko ikastarorik egongo Antzuolako KZGunean. Gogoratu ezazue, Internet eta posta elektronikoa erabiltzeko doaneko zerbitzua dela KZGunea.

Immersoren bainuetxe programan parte hartzeko aukera dute erretiratuek

Immersoren bainuetxe programan izena emateko epea zabaldu dute dagoeneko. Erretiratuen eta pentsiodunendako programa horri esker, bainuetxetan 12 eguneko egonaldia egiteko aukera izango dute. Abuztua baino lehen joan nahi dutenek, urtarrilaren 23ra arte dute izena emateko aukera. Horretarako, Udaltxeko Gizarte Langilearengana jo dezakezue.

KIROLA

Eruption taldeak irabazi zuen areto futboleko 24 orduen txapelketa

AINTZANE IRIZAR

Hogeita lau orduz futbol areto bihurtu zuten herriko frontoia. Hamabi taldek jardun zuten lehian, zapatu iluntzean hasi eta domeka iluntzera arte. Jo Ta Ke eta Eruption taldeak iritsi ziren finalera, eta Eruptionek eraman zuen, azkenean, txapela.

Zapatu iluntzean hasi eta domeka iluntzean amaitu zen Antzuolako Gazte Asanbladak antolatutako areto futboleko 24 orduen txapelketa. Guztira hamabi taldek jardun zuten elkarren aurka, eta Eruption taldeak jantzi zuen txapela. Domekan, 19:00etan hasi zen finala Eruption eta Jo Ta Ke taldeen artean. Azkenean, esan dugun moduan, gazteenek irabazi zuten, 7-4.

Ez zen aparteko partidua izan finalekoa; izan ere, bi taldeetako kideak nekatuta zeuden, partidu asko jokatu behar izan zituztela-ko finalera iristeko.

Hona hemen Eruption taldea osatu zuten futbol jokalariek: Iñaki Agirre, Iñaki Arbulu, Luis



Eruption taldeak txapelketa ona egin zuen.

OLAIA MONDRAGON

Franco, Ekaitz Olalde, Ibon Urtzelai, Iker Cabrera, Aitor Godoy, Imanol Lizarralde eta Mikel Idiakez. Horiexek dituzue argazkian azaltzen direnak. Paco Cabrera

bakarrrik falta da partiduaren ondoren ateratako argazkian.

Aipatzekoa da, bestalde, lehen bi postuetan sailkatutako taldeez gain, beste bi sari ere eman

zituztela: alde batetik, golegile nagusiaren saria Juan Luis Etxaniz bergararrak irabazi zuen; eta gol gutxien jasotako atezainarena, berriz, Alberto Gullonek.



Barkero omendu zuten abenduan

Orain dela lau urte auto istripuan hil zenetik hona, urtero egiten diote Xabier Barkeroi omenalditxo Antzuola Kirol Elkartekoek. AKEko futbol jokalaria zen Barkero.

Horrela, ordutik hona, futbol torneoa jokatu ohi dute urtero, Xabierren omenez; aurten, baina, ez zuten torneoirik antolatu. Antzuola Kirol Elkarteko futbol jokalarien aurka jokatu zuten partidua Estalako futbol zelaian, abenduaren 28an. Beteranok irabazi zuten, 2-1./A.I.

Independentzia Eguna martxoan ospatuko dute

Independentzia Eguna urtarrilean ospatu izan dute, baina aurten, antolatzaileek erabaki dute martxora arte atzeratzea. Horren arrazoiak dira, batetik, Gabon jaiak pasatu berri direla eta jendea nekatuta egoten dela garai honetan; eta, bestetik, sekulako hotza egiten duela frontoian urtarrilean. Aipatu beharra dago, bestalde, 375 urte bete zirela abenduaren 12an Antzuolak independentzia lortu zuela eta Bergararik banatu zela.

KIROLA

PARTIDUAK

FUTBOLA

Oraingo asteburuan ez da partidurik jokatu Estalan. Erregionalek eta neskek, kanpoan jokatu dute; erregionalek Urnietan, eta neskek, berriz, Zumaian. Kadeteek eta gazteek, berriz, hilaren 25era arte ez dute hasiko bigarren fasea.

EMAITZAK

FUTBOLA

Antzuola 3 Behobia 0 (2. erreg.)
Arrasate 2 Antzuola 2 (Gazteak)
Arrasate 6 Antzuola 4 (Kadeteak)
Urki 2 Antzuola 0 (Neskek)

LABUR

Traste zaharrak astero batuko dituzte, otsailetik

Otsailean hasita, astero batuko ditu Debagoieneko Mankomunitateak etxeko traste zaharrak. Eguenero pasatuko dira, koltxoiak, altzariak eta bestelako trasteak jasotzera. Mankomunitateko arduradunek azaldu digutenez, 20:00ak eta 22:00ak bitartean atera behar dira trasteak.

LARREA

TABERNA

Kalebarren 17
ANTZUOLA

ANTZUOLA

Apainketak eta
isolamenduak
Pladurrezko dibisioak

Kalegoi 21 ANTZUOLA
676 997 400
Biltegia: 943 78 70 40

Tomas Gezalaga

Apainketarako eta
industriarako pinturak
•
Paper margotuak
•
Moketak eta tapizatuak

Kalegoi 21
Tf. eta faxa 943 76 64 07
Poltsikokoa 616 277 999
ANTZUOLA / BERGARA

GAILUR

taberna eta
gozotegia

Buztinzuri 13 ANTZUOLA
Tf. 943 78 70 32

Tomas Gezalaga

Zoruen kutxilatuta
eta
barnizaketa

Kalegoi 21
Tf. eta faxa 943 76 64 07
Poltsikokoa 616 277 999
ANTZUOLA / BERGARA